

von Wulf Wager

## O'zapft isch!



I woiß net, von was d' Leut so träumat, aber i träum gwiiß net drvo, dass dia Data em Internet ond em Email-Verkehr sicher send. So blauäugig kasch ja net sei. Irgend en Graoßer Bruadr wird ons scho beobachta ond gucka, was mir so schreibat. Guad, i han jetzt koi Angscht, weil i koi Terrorischt ond au koi Salafischt, sondern bloß an Schwob ben und meine Mails

am liebschta en Schwäbisch schreib. Des vrstoht dr Obama ond seine Kuhbuaba do dromma en dr neua Welt net. Des isch gwiiß. Au wenn dr Obama Vrwandschaft en Besigheim hot.

Aber fir den Obama muaß mr scho mol a Wanze brecha. Der bemüht sich jo, sei Volk zom schütza. I wett des net alles läsa, was d' Leut so schreibat. Do isch sicher en Haufa Schofscheiß drbei. Grad mol 39 Prozent - so hot a neue Omfrog ergeba - von de Internetnutzer fühlat sich jetzt o'sicherer ond bloß 19 Prozent wellat ihr Vrhalta ändra. Do geit's mehrere Möglichkeita: Briaf schreiba (au et sicherer), Poschkarta schreiba (no öffentlicher), Rauchzoicha (au des vrstandat die Kuahbuaba dromma ibrm groða Teich, oder mr setzt sich zsamma zom schwätza.

Bei mir isch neulich mol zwoi Stonda dr Strom ausfalla. Do han i erscht gmerkt, dass i a total nette ond liebenswürdige Familie han.

Also Leutla, schaltat öfter mol das Saft von eurem Kombjudr ab, no hend'r a scheenr's Familialeba ond dr Obama muaß sich net so a'strega, schwäbische Mails zom lesa!

Bis näggschd Woch'

Euer

Wulf Wager

A handwritten signature in black ink, appearing to read 'Wulf Wager', with a long, sweeping underline.

Alle Kolumna zom nochlesa ondr: [www.woascht.de](http://www.woascht.de) oder em Facebook em Wulf Wager Fanclub.